



# KA HISTORI JONG

## KA ASSAM



NA KA BYNTA KI KCLASS IV-VI

DA

U BAH FRANK M. PUGH

JAIW, SHILLONG,



# HISTORICAL KA ASSAM

NA KA BYNTA KI KCLASS IV-VI.

DA

U BAH FRANK M. PUGH.

JAI AW, SHILLONG.



*KA EDISHON BAAR.*

*(All rights reserved)*

La pynmih da u Ncngthoh.



Printed at the Shillong Printing Works,  
Shillong.

**CHECKED**

1966.

**State Central Library  
Shillong.**



## KA 'TIEN LAMPHRANG

La slem la don ka jingkren na kiba dei peit skul bad nonghikai ba donkam, la kumno kumno, ban don ka kot Histori jong ka Ri Assam, kat kum ka jingiaid ki por bad ki juk mynta. U nongthoh u shem jingeh shibún ban pynbiang ia kata ka jingkwah bad jingdonkam, la u la pyrshang lum bún ki kot baiadei shaphang kata bad ban pule minot shuwa, hadien kata ban jied bad jiar, ka ban iadei ia ki khynnah rit kiba dang shu sdang pule shaphang kane ka hynta.

Da ka jingiakynduh bad u Professor M. Saikia u la nang ioh shuh shuh ka jingiarap, ka jingkdew lynti, jingpyni buit, jingpyniathuh ia ki kot ki sla bad ka jingiathuh hi da lade ia ki jingtip thymmai kat kum na ki kot pule ba dei khamtam shaphang ka ri Assam bad ka jingiaidei bad ki riawlum—

Da ka jingiashán bor lem jong u, u la lah ban sdang bad u sngewnguh eh ia ki nongthoh kot Histori kiba la iaid sha shuwa (kum ia u Dr S. K. Bhuyan, u nonghikai la jong hi, u Dr H. Lyngdoh bad u Mr. T. Cajee) kiba la prat ia kane ka lynti kaba sañium bad khohruh khohram. U kyrmen ban sa nang mih shuh shuh ki kot ha kane ka phang ki ban trei khamni, kat kum ka jingdawa jong ka jingiaid ki por.

U nongthoh u phah ia kane ka jingpyrshang barit sha ki khún ka ri kylleng ki ri lum jong ngi ban shim jinghikai bad ban ioh bor ioh mynsiem sha ki pateng ki ban dang khie.

Khublei baroh.

Jaiaw Shillong.  
1963.

FRANK M. PUGH.



# KI KYNTHUP

1. Ki Khasi ki wan nangno	....	peij 1
2. Ka Hima Malyngngiang ne Madur-Maskut. (Kumba 1500-1650 H. K.)	...	4
3. U Niang Raja Ka Hima Jaintiapur. (Kumba 1500 H. K. ei ei)	...	7
4. U Markuhain Bad U Sajar Nangli Jong Ka Hima Jaintiapur. (Kumba 1516-1532 H K.)	...	9
5. U Borsingh Syiem Ka Hima Sohra. (Kumba 1731-1770 H. K.)	...	11
6. U Tirot Singh Ka Hima Khatsawphra. (Kumba 1814-1834)	...	14
7. U Raja Dakhor Singh Ka Hima Shillong. (1903 1919)	....	16
8. Ka Assam.	....	20
9. U Kumar Bhaskar Varman jong Ka Hima Kamrupa. (606-650 H. K )	...	23
10. Ka Jingsynshar Ki Syiem Ahom. (1603-1641)	...	26
11. U Sutyinpha Lane U Jayadhwaj Singh (1648-1663)	...	28
12. Ka Jingialeh U Lashit Bar Phukan. (1667-1671)	...	31
13. Ka Jaymati Bad Ki Khún Ki Ksiew. (1681-1780)	...	35
14. Ka Assam Nadien U Lakshmi Singh Haduh Ka Jingwan Synshar Ki Phareng. (1780-1825)	....	38






**Ka**

## **Histori Jong ka Assam**

### **1. KI KHASI KI WAN NANGNO**

Ka ri Khasi ka long halor ki lúm Khasi Jaintia, ba la ker na shatei, na mihngi bad shathie da ki ri thor Kamrup, Nowgong, Kashar bad ka Shilot (ne Sylhet, ba la khot noh mynta Pakistan mihngi) ; katba na sha sepngi pat la don ki lúm Garo. Ha ka ri Khasi-Jaintia don shibún ki syntai lúm, uba jrong tam na ki u long u Lúm Shillong uba don hamar pdeng jong ka ri. Ki wah ruh ki don shibún, kaba heh tam na ki ka long ka wah Kupli sha mihngi bad ka Wah Rilang-Kynshi sha sepngi.


Ki lúm ki long kiba itynnat ; hynrei ka jaka kam seisoh kum ha ri thor. Kumta ki briew kiba shong ha ki lúm ki kylla long kiba eh, ba shait, ba khlain bad baksah. Ki ìoh ìa ka bám da ka jingtrei shitom. Hynrei kim ìoh suk kum ki briew kiba shong ha ki ri thor, ha kaba lah ban ìoh u khaw u kba bad ka dohkha dohpnat kyrhai. Ha ki lúm ki háp rep phan, riewhadem, sohriew bad ki thung ki diengsoh bad ki pài khamtam ha ki ranab lúm.



Ka map R1 Khasi-Jaintia.

Hynrei ka don ka jingïakhaï pateng, ka ïa thied ka ïadie bad ki briew kiba na sha ri thor, wat la ki ïapher ha ka ktien ka thylliej, ha ki rukom im, ha ki dustur bad ha ka niam.

Ka la long ka jinglyngngoh hapdeng ki riewstad mynta, ban iit nangno ki Khasi ki wan nyngkong eh. Ka jingïathuhkhana hiar-pateng ka ong ba mynnor eh u Khasi bad u Dkhar ki ïawan jngi lyngba ka jingshlei um ka bakhrav. Ha kata ka jingïajngi, u Dkhar u buh ïa ka kot halor ka jaiñspong. U Khasi pat u kbum ïa ka ha ka shyntur. Katba nang ïajngi kumta, u Khasi u kum nguid noh ïa ka kot shapoh kpoh. Hana, dei na kata ka daw ba u Khasi um don kot don sla, jingthoh jingtar shuh. Haba u leh niam leh rukom bad u sneng u kraw, ka jingstad ka mih napoh jong u, um shu pule kumba leh ki para briew sha ri thor. Kumta naduh kata ka por ki jah bad duh noh ka jingnang ban thoh dak bad ban pule kot.



U Papuan na shaphang Pt ilippines.

Na ka jingïit ki riewstad pat mynta ki ong ba la kumno kumno ki wan nyngkong na sha

shiliang ka Bay jong ka Bengal na shaphang mihngi shuh shuh. La shem ba ki Khasi Pnar ki iajan ha ka ktien ka thylliej, ka dur ka dar bad ha ki dustur bad rukom im bad ki briew kiba shato, kiba na sha Laos.

## 2. KA HIMA MALYNGNGIANG NE MADUR-MASKUT

(Kumba 1500-1650 H. K.)

### **U Mailong Raja bad u Kyllong Raja.**

Ha kawei ka por la don kawei ka hima kaba donbor shibún ha ri Khasi-Jaintia. Ka la long ka hima barim tam ba ngi lah ban ioh-sngew ha ki ri lúm jong ngi. Ka kyrteng jong kata ka hima ka la long ka hima Malyngngiang ne Madur-Maskut. La ju khot ia ki syiem jong ka ki Syiem-blei. Ki la synshar naduh ri thor Nowgong lyngba ki lúm Khasi-Jaintia shaduh Shilot (Sylhet).

Ka nongbah jong kane ka Hima Bah ka kyrteng ka law-dai-ja hajan Wahiajer mynta, halor uwei u lúm. Kawei ka syiem kaba khlad na kane ka hima ka la leit seng hima ha Mawsynram.

U Syiem uba nyngkong eh jong ka, ba ngi tip, u la long u Mailong Raja. Une u Syiem u la long uba donbor shibún bad u bakhraw bor

eh ha kaba pynār hima. Ka hima jong u ka la ialong markhap pud bad ki Syiem Jaintia. U Syiem uba synshar pat ha Jaintia ha kata ka por u la long u Syiem Markuhain.

Une u Mailong Raja u la khroh ia u Syiem Markuhain uba shong ha Nartiang ban wan iakren pynbeit ia ka jingiakajia pud hapdeng jong ki sha law-dai-ja. U Syiem Markuhain u la lum ia ka dorbar ki hynñiew doloï kiba hapoh jong u ban iapyrkhat shaphang kane. U Doloï Jowai u khang ia u ban leit bad u la ai buit ban phah tang da ki doloï. Hynriew ki doloï ki la ialeit bad ki la pynriam syiem shynrang ia u Kaia Bandesi bad syiem kynthei ia ka Lipang Rani.

Tang shu poi ma ki u Mailong Raja u pynkhreh ka khawai dawai bah bad pyndih buaid ia ki baroh phar. Nangta u phah pynñep lut pat kdar-dar-dar ia ki baroh.

Ka khubor ka la poi sha u Syiem Markuhain ia kane ka jingjia bad u la khreh phet ; hynrei u Doloï Jowai u khang biang ia u. Ki la iakhreh phraphew ngut ki rang-kieng-wait kieng-stieh bad la phah ia ki sha law-dai-ja bad ki ar ngut ki shakri u Mailong Raja kiba na Jowai. Hamar ba ki dang iabuaid ja hapdeng ka jingkmen bakhraw, kine ki ar ngut ki shakri

ki la pyllait tuh ïa ki rang-ïalehthma na Jowai kiba la pom lut ïa u shnong u thaw bad wiang ding katba ki dang ïathiah mynmiet.

U Syiem Malyngngiang uba sah miet ha kata ka por ha Mawdymmai, u la phet nalor u kulai, tang shu ïohi ïa ka tдем ding ba ka klang ha shnong jong u. Hynrei ki rang-kieng-wait na Jowai ki la ap lypa ha lynti bad tang u shu poi ma u, ki pom ïa u ar dkhот bad rah ïa ka khlieh jong u sha Jaintiaṗur

Hadien jong u la mih bujli da uwei u Syiem bashynrang hi sriem kum ma u. Ka kyrteng uta u Syiem ka long u Kyllong Raja.

Une u Syiem u la long uba khlain palat. Ym ju lah pynṗap duh ïa u. La ong, ba mynta i kumba la pynṗap ha ka thma, ynda lashai ïohi ïa u ba u ïaid pa ïaid biang kum bam shym lei lei Kane ka la pynlyngngoh shibún ïa ki Jaintia.

Khatduh khatwai ki la thaw da ka buit kumno ban jop ïa u. Ki la pynkhreh da kawei ka thei-samla babhabriew tam bad bashalak tam jong ka thaiṇ Jaintia Ki la suhbuit ïa ka ba kan treh bən leit long mahadei ïa une u syiem. U Syiem Kyllong Raja de u la ngat ha kane ka buit. U la ïashem ïa kə ha law-dai-ja ha Iew Madur-Maskut bad u la pynlong mahadei ïa ka. Ka de, suki suki ka la ïoh tuh

na u ïa ka jingtip shaphang ka jingkhlain bor jong u bad ka la ai jingtip ïa kata sha ki Jaintia. Da kata ka buit la ïoh ban pynïap ïa u Kyllong Raja katba u dang leit sum ha kawei ka wah hapoh khlaw. Ka hima Madur-Maskut te ka pra bad sapra naduh kata hi ka por artat.


### 3. U NIANG RAJA KA HIMA JAINTIAPUR.

(Kumba 1500 H. K. ei ei).

U Niang Raja u long u Syiem Jaintiapur badonnám shibún. Ym ju lah satia ban pynïap ïa u. Ki Syiem Sutnga kiba ha ki ri lúm Jaintia ha kata ka por ki la pyrshang ban pynïap ïa u, hynrei kim ju lah. Kumta ki la shu thaw noh da ka buit. Ki la wad ar ngut ki samla kiba sian shibún. Ki la pynbeit ba kin leit shong shakri ha ka Mahadei u Niang Raja. Ka Mahadei ruh ka la pdiang ïa ki kum ki shakri ïing.

Kine ki shakri ki la trei bha katta katta ïa ka kam. Ki la lah ban kem ïa ka jingieit bad jingshaniah jong ka Mahadei. Ha kawei ka sngi ki la kylli twad buit ïa ka hangno ka bor u tnga jong ka ka don. Ka de ba ka shaniah ïa ki ka la ïathuh. Ka ïathuh ba u shait leit sum marwei sha kawei ka jaka bakynjah. Ym

ju don mano mano ba tip hangno kata ka don.  
Dei hangta ba u buh noh la ki tiar ki tar ïaleh-  
thma, khlem nongap.



Ki Mawbyinna ba ha Jaintiapur.



Kita ki samla de ki la khroh ïa ka Mahadei ban ïathuh hangno kata ka jaka ka don. Kaba pli ka Mahadei bashida jinglong ka la kum ïathuh sor bad ka la khang ïap khang im ïa ki ban nym leit jan shata. Bad ki la kular de ban leh kumta ïa ka.

Ynda ha kawei ka sngi, sor ki la ïaleit ïapar tuh ban leit shata sha ka jaka ba u sum. U tang shu ïohi ïa ki, u rypsied pum hapoh um bad ngam thiaw artat hangta. Kumta mar mar ki wan ïathuh ha ki Syiem Sutnga. Ki Syiem Sutnga de ki la ïakmen bad ki la leit dokhol ïa ka hima jong u kaba sha ri thor. Naduh kata ka por ka hima Jaintiapur ka háp hapoh ka jingsynshar ki Syiem ri-lúm kiba na Sutnga.

#### 4. U MARKUHAIN BAD U SAJAR NANGLI JONG KA HIMA JAINTIAPUR

(Kumba 1516-1532)

Don uwei u Syiem Jaintiapur bakhrawbor uba kyrteng u Syiem Markuhain. Hapoh jong u la don hynñiew ngut ki doloï. Une u la long u Syiem Samla ba dang marwei bad u la wad Mahadei. U ïohi ba don kawei ka khún kynthei u Sajar Nangli bañabiang kyrdan bad u. U la phah da la ki briew jong u ban twad jingmut na u Sajar Nangli. Hynrei u Sajar

Nangli um mon ban ai la ka khún kynthei bamarwei jong u ha u Syiem.

U Syiem u la pynmih hukum ban shna kawei ka nan ha Nartiang. U Sajar Nangli bad la ki paid babún jong u, u la pyndep hapteng khyndiat sngi. Kane ka la pynsngewbha ia u Syiem Markuhain. U la khreh ka khawai ka dawai kaba khraw ban ai burom ia u Sajar Nangli bad ia ki paid jong u. Nangta u khroh ia u Sajar Nangli ban sahmiat, hynrei um treh.

Nangta u Syiem u la thap ban shu phah knieh jubor ia ka khún kynthei jong u. U Sajar Nangli nangta tang iohsngew ia kata u la khreh phet noh. U la lum la u paid babún ban ialeit ryngkat bad u. Kine ki la iateh jutang ban nym iehnoh lyndet lyndang ia u. Ki la iatih nan kawei tang mar shisien tih da la ki tdong ryntieh. Ia kata ka nan la khot haduh mynta ka Biar u Sajar. Ka jingbún jong uta u paid, la ong, ka la long kaba khraw shibún. Don uwei u synrei ba ki buh pyngkiang lynti ha ka lynti iaid jong ki. Da ka jingiauh u paid babún da la ki pohjat jong ki, uta u synrei u la lut artat khoit.

U Sajar Nangli bad u paid babún u ialeit shaphang sepngi na Raliang bad hana, ki leit seng hima pat ha Khatsawphra.

## 5. U BORSINGH SYIEM KA HIMA SOHRA

(Kumba 1731-1770).

U Borsingh Syiem u long u Syiem Sohra uba khrawnám. Ha ka por ka jinglong syiem jong u, u Syiem Borkusain bad ka para jong u ka Kong Rimai na ka hima Jaintiapur ki shah set ha Nongkrem ha ki Syiem Shillong. U myntri rangbah jong ki uba kyr teng u Lyngskor Potiphas u la leit khroh ia u Borsingh Syiem na Sohra ban pyllait ia u. U Borsingh Syiem de u ai buit ia u kumno ban iakynduh bad u Syiem Borkusain. U bthah ia u ban riam pukir bad ban leit rwai dkhar ha Nongkrem. Tang shu iakynduh ia u Syiem Borkusain un iatehkular katno un ai lada pyllait ia u.

U Potiphas de u la leit bad ioh ktien ba un ai katto katne ki shnong ha ri dkhar sha u Syiem Sohra. Kumta u Borsingh Syiem u la phah biang ban leit sha Nongkrem kumba mynshuwa. Tangba ha kane shisien un da pyndih buaid ia ki nongset byndi jong ki Syiem (kiba la shah set hapoh sem sniang). U ong artat ba ki tang shu lait kin ialeh ban ryngkang sha ka pud u Syiem Sohra uba dang ap bad la ki paid iapom jong u.

U Potiphas uba la leit bad ki katto katne ki lok de u la leh, kumba la bthah. La pyndih-buaid ia ki nongap. Ki la thlieh ia ka jyng-khang. La pynkit ia ki Syiem Jaintiapur sha ka pud Sohra bad la ialam ia ki sha Sohra.

Ha Sohra ki iashong shipor. Hynrei ki kwah ban leit phai noh sha la shnong. Kumta ki la ialeit ryngkat bad u Borsingh Syiem. La ialam ruh ia u Piah Lyngskor na ka hima Sohra ban iasynran lang ia u Syiem Sohra.

Ha ka jaka ban ai ia kita ki jaka, u Syiem Borkusain u shet kylla pynban. U iawer leit behmrad ban iashong mar la ka lieng. Ia u Borsingh Syiem la pynpoi sha Shilot bad la set ha ka kut u jamindar Sujlar. Ia lade pat u wan phai sha la shnong ha Jaintiapur.

U Piah Lyngskor u la sngewlyngngoh balei ba wan phai shnong tang u Syiem Borkusain bad ba u Borsingh Syiem um wan phai. Kane ka la pynklusai jingmut ia u. U la leit wad ia u Syiem Borkusain ban kylli balei, hynrei um man lah iashem satia. Kumta u leit iathuh noh ha u Potiphas.

U Potiphas de u leit kylli na u Syiem Borkusain balei u Borsingh Syiem um wan phai. Hangta u sngewthuh ia ka jingthmu runar u Syiem Borkusain. U wan iathuh ha u

Piah Lyngskor bad ong ia u ba un leit noh shuwa sha Sohra. Ia lade pat u pynkhih tik ban ialeh pyrshah ia u Syiem Borkusain.

U Syiem Borkusain u tip ia ka bor u Potiphas ha ka hima. Kumta u iasuh buit bad ka tnga jong u ban pyniap ia u, bad la ioh pyniap hamar ba u dang iohthiah mynmiet.

Uwei u briew na Wahlong u leit khaï pateng sha Shilot. U leit kum iohi ia u briew uba kum u Borsingh Syiem ba u dih um hapoh ka kut u jamindar Sujlar. Mar mar u wan iathuh sha Sohra ia kaba u iohi baroh. Ki myntri Sohra de ki leit khmih bad lap shisha kumta. Ki la thaw buit ban pyllait ia u nangta, bad u la lait. U Syiem u la wan poi sha Sohra hadien lai snem bad iathuh lut ia ki jingjia baroh ha ki myntri bad ka dorbar.

U Borsingh Syiem u mut ban ialethma bad u Syiem Borkusain. Hynrei u Morsing Syiem na ka jait Syiem Sohra u shah pynbám tyngka ha u Syiem Borkusain bad u iashah noh bad u lem bad katto katne ki myntri. Kumta u Borsingh Syiem u shu kynriah noh na Sohra ban leit seng hima noh ha Mawsmat.

## 6. U TIROT SINGH KA HIMA KHATSAWPHRA

(Kumba 1814-1834)

U Tirot Singh u long u Syiem Khatsawphra, ha ka por ka jingwan kiew ki Phareng sha ri lúm Khasi. U la long uba tbit ban siat khnam naduh dang khynnah.

Ha ka por une u Syiem, u Iskat Sahep (*David Scott*) u long u Sahep rangbah ha Gauhati. Une u sahep u kwah pom surok kulai na Gauhati sha Shilot lyngba ka hima Nongkhlaw. Kumta u la pyniadei lok bad u Tirot Singh, namar u Tirot Singh u iawan ialeit teng teng sha Borduar, ka jaka jong u ba hajan Gauhati.

La khot sngewbha ia u Iskat Sahep sha ka hima Nongkhlaw ban pynshai ia kata ha ka dorbar. Ka dorbar hadien ka jingiasaidnia bad jingiapyini nia bajur ka la iarai ban shah.

Tang shu ioh bor kumta, u Iskat Sahep u pynkiew shipai ha Nongkhlaw. U phah ar ngut ki sahep rangbah hapoh iong u. U pynshna iing dak bangla. U pynkiew ki nongshna surok na Shilot bad Gauhati.

Kine ki leh kulmar ha iëw ha hat, ha jaka tong um bad khlaw thohdieng. Don ruh kiba ong ba ka Sorkar Bahadur jong ki kan sa wan jop bad iuh top ia ki ri lúm kumba leh sha thor. Kane ka la sawa sha ki shkor ki myntri Nongkhlaw.

Ki myntri Nongkhlaw ki la iadorbar harieh harieh bad ki háp jingmut ban khang noh ia kane ka jingpom surok. Kumta sdang da ka thma ir.

La pyniáp ia uwei u sahep Lepton Beddingfield, katba uwei pat u lait noh. Ka Phet Syiem, ka kmie u Tirot Singh, ka iaieit ia sngewbha bad u Iskat Sahep. Kam kwah ba un iáp. Ka la ai buit ia u ban phet la dang step phyrngab sha Sohra.

Ki khla-wait ka Nongkhlaw ki la beh sia sia ia u, hynrei kim lap shuh. La ong ba u Iskat Sahep u pashat paisa nalog jrong u kulai katba u nang phet ; bad katba ki nang ialut por ka iatám paisa ha lynti, u la nang lait noh. La pdiang sngewbha ia u da u Syiem Sohra.

Hynrei u Tirot Singh u pynkhih ia ki hima Khasi baroh ban beh noh ia ki Phareng. Bad la don ruh katto katne na sha thor Assam kiba la iarap ia u ha ka ban beh noh ia ki Phareng.

Hynrei da ka jingpynbám tyngka ía uwei na ki Syiem Khasi ka Sorkar Phareng ka la lah ban tip ía ka jaka rieh u Tirot Singh bad ka la kem ía u, hadien ka jingialeh kaba la neh saw snem.

Ki rangbah nongiapam badonnám ha kata ka por kí la long u Mon Bhut, u Lorshon Jarain bad u Khein Kongor, bad ka thma ka la nang íaid wat hadien ba la kem ía u Tirot Singh.

La leit íalam ía u Tirot Singh sha Dakka bad la set phatok ía u hangta. U la íap noh ha phatok ha ka 29 tarik u Lber 1834. U lah ka íap kum u Syiem ha íing byndi ban ía ka im kum u mraw ha ka khet Khatsawphra. Hadien jong u ki hima Khasi ter shi ter ki la nang íaid sha ka kti ka Sorkar Phareng.


## 7. U RAJA DAKHOR SINGH KA HIMA SHILLONG

(1903-1919)

Ka Hima Shillong ka la long ka hima kaba íár shibún. La ngeit ba ka nongseng banyngkong eh jong kane ka hima ka la long ka Pah Syntiew. Kane ka la long ka kynthei ba la shu íoh kem napoh ka krem Marai, ba hajan u



Lúm Shillong, da kaba pah ne khroh da u syntiew. Ka dei ma ka ruh kaba seng nyngkong ãa ka shad ha ri Khasi.



U Syiem Dakhor Singh.

Ki Syiem kiba khraw bor ki synshar ter shi ter ãa kane ka hima. Ha kawei ka por ka


hima Shillong ka la iár naduh ki them ka wah  
Brama ha Kamrup haduh ki them ka wah  
Surma ha Shilot.

Hadien hadien ia ka hima Shillong la  
pynpait sha ki ar hima. Kawei ka jait Syiem  
ba iapait ka seng ia ka hima Myllem kaba  
mynta Kawei pat ka jait syiem ba la shah  
thang la búnsien ka seng hima noh ha Nong-  
kseh. Hadien hadien ka pynkynriah noh ia  
ka nongbah banyngkong eh na Nongkseh sha  
Nongkrem bad na Nongkrem pat sa sha Smit.

U Syiem bapawnám bad bakhatduh eh  
na kine ki Syiem Nongkrem u la long u Syiem  
Dakhor Singh. Une u la long syiem hadien  
ka jinglap u Syiem Klur Sngi. Ha ka por  
une u syiem ki Phareng ki la wan kiew sha  
ri lúm Khasi.

U Syiem Dakhor u pynkynriah ia ka iing-  
sád iingsunon na lúm Smit sha madan Smit,  
kaba sah haduh mynta U tei ruh ka iing-  
dorbar bad kawei ka iing dak bangla. U long  
uba nang bastad bad uba nang ban ri la ka  
burom bad ia ka burom ka hima. U la  
synshar da ka mynsiem babeit bahok bad da  
ka bor ka buit baroh ban pynkiew ia ka  
jingnang jingstad bad jingloh jingkot jong u  
khún u hajar. Baroh kat kiba la ithuh bad  
iadei kam bad u ki pyrto ia ka jinglong babha  
bad jingdon-akor jong u. Ka Sorkar Phareng  
hi ka la sngew ñiewkor shibún eh ia ki kam

babha baroh ba u leh. Kumta ka la pynkup noh ia u da ka nám Raja ba la tip noh ia u hadien habud kum u Raja Dakhor Singh. U la ioh ia kane ka nám ha ka snem 1914. Kiba ioh ia kane ka nám Raja hapteng ki Syiem Khasi ki la long tang saw ngut. Kita ki la long (1) u Syiem Donsing jong ka hima Nongstoin (1863), (2) u Syiem Mit Sing jong ka hima Langrin (1874), (3) u Syiem Kinesing jong ka hima Khatsawphra (1903) bad u Syiem Dakhor Sing (1914).



U Syiem Dakhor Singh bad ka Dorbar

U Syiem Dakhor Singh u la iap noh ha ka snem 1919. Kumta u la ioh ia ka nám Raja ha ka snem ba sdang ka Thma Bah Pyrthei kaba nyngkong bad u la iap pat ha ka snem ba la wai ka Thma Bah Pyrthei kaba nyngkong (1914-1918).

## 8. KA ASSAM

Ka hima Assam ka long ha tduh eh ha ka liang mihngi jong ka hima India ba mynta, lait noh ka Nagaland. Shatei ne shaneng jong ka la don da ki Lúm Bah Makashang ba la khot Lúm Himalaya. Hangne la don ka Tibet bad ka Bhutan. Sha mihngi ne kamon jong ka, la don da ki lúm Burma. Shathie ne sharum la don ki lúm Tippera bad sha sepngi ne kadiang pat la don ka Bengal ne ka Pakistan Mihngi ba ki khot mynta. Kumta hapoh jong ka don ki lúm Garo, Khasi - Jaintia, Miso, Kashar bad Naga de kiba iabteng ter ter bad ar tylli pat ki them ne thor bah jong ka wah Brahmaputra bad Surma.

Nyngkong nyngshab eh ia ka hima Assam la tip kum ka Prag-jyotisha. Hadien hadien la tip kum ka hima Kamrupa. Kane ka hima Kamrupa ka kynthup ruh de ia ka shatei jong ka Bengal, ha kaba don ka Kutsh-Bihar bad Rangpur.

Ka nongbah banyngkong eh ka la long ka Prag-jyotishpur kaba hajan ka Gauhati



Ka map Assam

kaba mynta. Hadien kata la pynkynriah sha Kamatapur shajan Kutsh-Bihar, katba ha Kamrup la synshar da ki Bhuyan. Nadien kata la pynkynriah pat sha Kutsh-Bihar da u Syiem Narayan uba kiew khet ha ka snem 1540 H. K.

Kawei ka jaitbynriew Tai ne Shan kaba donbor shibún ha ki thain Shaina ka wan hiarthma sha Brahmaputra. Ka seng la ka hima ba la khot ka hima Asem (ne Ahom). Kane ka wan hiarthma naduh ka snem 1228 H. K. Dei na kine ki nonghiarthma badonnám ba sa long ka hima Assam kaba mynta la ka ktien jong ki la khot Assamia. Imat eh kane ka ktien ka wan na sha ka hima Magadha (ba la khot Bihar mynta) ha ki por ki Syiem Gupta bakhraw.

Kaba ngi da tip thikna bha shaphang ka Assam ka long eh naduh ka jingwanjngoh kai uwei u Pukir Shaina bastad, uba kyrteug u Houen Tsang (ne Yuan Chwang). Une u la buh jingthoh shibún shaphang ka ri Assam kaba ha kata ka por. U iathuh ba ha ka hima Kamrup ha kata ka por, la shong da ki briew kiba lyngkot ka rynneng, kiba lam iong snieh-doh bad kiba beit-hok. Ki iapher khyndiat ka ktien na kiba shong sha pdeng India.

Kumta ngi shem ha ka ktien Khasi hi ruh bún bún ki ktien Aryan ne Sanskrit ha ka iakren iakhana, ka ktien ka thylliej. Kane ka leit long kumta imat na ka ialeit iawan ha ka leit iew leit hat ne ha ka iaiaid lynti syngkien.

## 9. U KUMAR BHASKAR VARMAN JONG KA HIMA KAMRUPA

(606-650 H. K.)

Naduh ki por barim bajah haduh ka snem 1826 ia ka Assam la synshar hi da ki syiem jong ka hi. Ha bún ki sien kine ki syiem Assam ki ju iateh lok teh jor bad ki patsha bakhraw jong ka ri India.

U Syiem banyngkong eh uba iateh lok bad ki Syiem India u la long u Kumar Bhaskar Barman. Une u la synshar ha Assam ha ka por ba u Harshabardhan u synshar ha ki thor ka wah Ganga. Ngi don ka jingthoh jingtar une u patsha bakhraw ka ri India uba la synshar ha ki snem 606-648 H. K.

Uwei u nongkit-tien-syiem jong u Bhaskar Barman u la leit rah ki jingai bakordor kum ki mawkordor, ki jingthaiñ jaiñ, ki jaiñ rusom, ki stieh snieh, kaiphul, kwai, ki kot ki sla ba la thoh itynnath eh, bad kawei ka shatri

jadu. U Harsha ruh u la pdiang sngewbha ia kita bad u la phah pli ki jingai sngewbha sha u da ki briew ki baheh bahaiñ.

Ha kata ka por la don de u Nongiaid pukir Shaina badonnám sha India. Uta u la long u Houen Tsang (Yuan Chwang). Une u Houen Tsang u la wan jngoh kai ia u Bhaskar Barman bad ia ka ri Assam. Une u iathuh ia u Harsha shaphang u Bhaskar. Kumta u Harsha u la khot sngewbha ia u sha Kanouj, ka nongbah jong u, ha ka jingialang bakhraw. U Bhaskar ryngkat bad u Houen Tsang ki la ialeit ha ka snem 644 H.K. Ka jingiaid lynti ka la long kaba jngai 90 sngi bad la synran ia ki da ki hati sanspah tylli. Ha kawei pat ka jingialang kaba ha Allahabad, u Houen Tsang u la leit rah sha Shaina táng ia ka jingai sngewbha ba na u Bhaskar Barman. Kata ka la long ka jaiñ tawah tyrpeng ba la pynpúr itynn timer da u shñiuh mrad.

U Houen Tsang u thoh kumne shaphang ka Assam :—

Ka ri Kamrupa ka heh kumba 1,700 mail pyllun. Ka ri ka long kaba seisoh kaba don kyrhai ki sohphán bad ki snepkor. Ka jinglong ka bneng ka long kaba sngewtynnat. Ki briew ki long kiba shida mynsiem bad babeit jingmut. Ki long kiba lyngkot ka rynieng, bad kiba byrtem ka snieh-doh. Ka ktien jong



ki ka iapher tang khyndiat na ka ktien India. Ka jinglong briew jong ki ka long kaba dar-dar bad kaba dom briew. Ki long kiba lah ban bat jingkybmaw bha bad kiba minot ban stad.

Ki ngeit ka niam banylla. Ki dwai ha kaba jarjar. U Syiem uba ha kata ka por u dei na ka jait Syiem hyndai jong ki Narayan Deb. U Syiem uba dang synshar u long u Bhaskar Barman ba la ai nám Kumar.

Sha mihngi jong kane ka ri la ker da ki lúm. Ki briew kiba shong shata ki dei ki Man na ki Shaina. Shathie pat don kynhún kynhún ki hati khlaw. Kumta la pyndonkam da ki hati ban ialethma ha kane ka ri.

Ka hima u Bhaskar Barman hi imat ka iar haduh Shilot namar la shem ki pliang tama kiba pyni ia kata. Ka kynthup ia ka Assam baroh kawei, lait noh ki lúm Naga, Miso, Manipur bad lehse kiwei de ; hynrei ka tda shaduh Bhutan bad ka Bengal ba shaphang shatei.

Ha ki sngi khatduh jong u Bhaskar Barman, u la phah jingai sngewbha da ki jyngri, ki kulai bad ki riam ki beit ba itynnai ia ki shipai sha ki nongwanhiarthma ba na Shaina hadien ka jinglap u Harsha.

## 10. KA JINGSYNSHAR KI SYIEM AHOM (1603-1641)

Hadien u Bhaskar Barman la mih bún bún kiwei pat ki jait syiem kiba synshar ha Assam. Kine ki knieh ia ka bor synshar ki syiem Kamrupa bad seng hima la ka jong ka jing-synshar Ahom. Kine ki wan na sha mihngi, na shaphang Shaina ne Burma. Ia kine ki syiem la khot ki Syiem Ahom bad ki sdang synshar naduh ka snem 1228 H.K.

Hapdeng kine, u Syiem uba donbor eh nyngkong nyngshab uba ialeh pyrshah ia ki syiem Mughal u la long u Suhungmung lane u Dihingia Raja (kata, u Syiem Dihing). Ha ka snem 1504, katto katne na ki Naga ki ialeh pyrshah ia une u Syiem Suhungmung. U la phah ialeh da ki ar ngut ki rangbah shipai jong u, u Bar Gohain bad u Burha Gohain. Ki Naga ki la shah jop. U Syiem Naga nangta u phah la ka khún bad sawspah ki hati kum ka dak ka jingnguh Syiem ia u Syiem Ahom.

Hadien pat ha ka jingialeh bad ki Mughal u la pynlong rangbah thnia da u Syiem Naga uba kyrting u Thawmung Lunhtao, (ba la khot noh u Barpatra Guhain). Ki Syiem Mughal ki phah shipai hapoh u nongialam ba rangbah jong ki, u Turbak. Hynrei da ka jingstad-buit

tuh jong une u rangbah Naga, la ioh pyniäp ia u Turbak bad ka jingduh ka la long kaba khraw na ka liang ki Musulman.

Hadien jong une u Syiem la kiew khet da u khún jong u, bad hadien jong u pat da u Susengpha, lane u Pratap Singha (ba la tip pat hadien kum u Burha Raja lane u Syiem Tymmen). U Syiem Jaintia uba kyrteng u Jasa Manik (1612-25), u tyrwa ia la ka khún ha u, lada u iaid lyngba ia ka hima Kashari han wan shim ia ka. Kumta la long ka thma hapdeng u Pratap Singha, u Syiem Ahom, bad u Pratap Narayan, u Syiem Kashari. Ha kaba khatduh la lah u Pratap Singha, u Syiem Ahom, bad u la ioh wan shim ia ka khún syiem Jaintia. Kumta u la long u pyrsa-kurim jong u Syiem Jaintia.

Hadien kata ia ka Assam la wan hiarthma da ki Musulman na Bengal. U Pratap Singha u la kyili ia ka daw balei ki kwah wan hiarthma. Ki Mughal ki la jubab ba ki dawa dieng, sohmarit, hati bad ksiar. U Pratap u la bitar bad la ong, "Ngan nym ai wat shisla siej, lymne sohmarit khlaw, lymne shisymbogh u shyäp na wah Brahmaputra, ynnai ia ong shaphang ki hati." Kumta la khie ka thma kaba jur bad ka la neh haduh shiphew snem.

Baroh ar liang ki la iashah jop búnsien. Hynrei u Pratap Singha u leit donbok ba

u don uwei u rangbah thma badonnám ba la khot Memai Tamuli Besburua. Ki brierw ki shait khot ĩa u u Mama, ba u dei u Mama u Syiem. Une u mama da ka jingstad jong u u la lah ban pynwan ĩa ki Mughal ban ĩakohnguh ĩasuk noh ha ki jingtyrwa jong u. Ba ki la ĩathait, la ĩalut ĩasep bún bad ba la ĩaĩap bún bún na baroh ar liang, ki la ĩasuk noh. Ka pud ka sám ka la háp biang kum ha ka por u Syiem Suhungmung (lane u Raja Dihing).

# 11. U SUTYINPHA LANE U JAYADHWAJ SINGH

(1648-1663)

Hadien jong u Pratap Singha la búd sa ar ngut ki syiem kiba tlot bor. Hadien jong ki pat, ki myntri ki la pynkiew khet ĩa u Sutyinpha (ĩa uba la tip noh hadien kum u Jayadhwaj Singh).

Dei ha ka por ka jingsynshar jong u ba la jia ka jingkulmar hapdeng ki khún syiem u Shah Jahan u Patsha ka hima Mughal, ban ĩaknieh ĩa ka khet Delhi. Kumta une u Syiem Ahom u la phah ar ngut ki rangbah shipai ban beh noh ĩa ka kynhún shipai Mughal haduh ka wah Kartoa, ka pud rim jong ka Assam. Uwei na ki rangbah shipai Ahom uba dei hi u para jong u Memai Tamuli Besburua, u rangbah

shipai badonnám jong u Pratap Singha. Ka thma kaba jur la ìaleh hapteng ki shipai Mughal bad ki shipai Ahom. Ha kaba khatduh ki shipai Mughal ki la háp kynriah haduh Dakka, ha ka snem 1660.

Ha kata ka por u Aurangseb u la kiew ha ka khet ha Delhi. Hamar kata ka por don jingkulmar pat hapteng ki rangbah shipai ka Assam. Ka rukom pynäid thma ha kata ka por, ka long ba wat tang u ksai ba ìoh bat na ki nongshún u kylla long u jong ka hima Assam baroh kawei. Dei ban pynpoi sha u syiem bad ka hima, tat haduh ban da rai kumno yn leh da u Syiem bad ka hima. Hynrei don na ki shipai bad rangbah shipai kiba leh lyndet ìa kane ka rukom pynäid thma.

U Syiem u la phah da uwei u rangbah syiem ban tohkit ìa kane. Kane ka jingleh ka la pynmong wat ìa u kthaw-kurim u Syiem hi, uba kyrteng u Shangmung. Kumta ki lai ngut ki rangbah shipai bakynsai tam ki la ìaphoi bad u Syiem bad kim treh ìalehthma ha ka rukom kaba dei.

U Aurangseb pat u la phah da u rangbah shipai badonnám jong u, uba kyrteng u Mir Jumla ban leit jop biang ìa ki jaka ba la duh ha Assam bad Kutsh Bihar.

Ka jingāleh ka la long kaba jur. Shipor la pynher krad ia ka kynhún shipai Assam, la ioh knieh ia ka nongbah jong ka, ka Gargoan, bad la pynphet ia u Syiem Assam shaduh ki tduh ba sha mihngi jong ka hima.

Hynrei ha ka por slap, ki shipai Assam ki wan hiarthma tuh mynmiet mynmiet. U Mir Jumla u la don ha ka khim khait. Ym don bām don di. U ia lade ruh u la ioh pang. Ym lah ioh khubor shuh na sha la ka hima la jong. Ia ki lynti ki syngkien la dkhat bad ka jingāp bad jingjulor ka bam kai shuh. Ki shipai Mughal ki la duh jingkyrmen thiaw.

Hynrei tang shu poi ki nai synrai, la wan poi ka jingārap na Bengal. Ka lynti ka syngkien kam ktieh shuh bad kam wit. Kumta ka kynhún shipai Mughal ka la sngew lait mynsiem wo. Ki rangbah shipai Assam ruh kim treh ialeh ha ka rukom ba dei. Kumta da kaba jem la ioh biang ia ki bynta ba la duh da ka kynhún shipai Mughal.

U Syiem um banse shuh ban tyrwa iasuk noh. U la kular ban phah la ka khún sha iing-Syiem u Patsha Aurangseb bad ka spah ka hajar nador ki hati ban pynbiang ia ka jinglut jingsep ka thma. Ka thma ka la wai ha ka snem 1663 bad u Mir Jumla u la leit phai noh sha la Bengal, hynrei u la iap noh tang hapdeng lai bnai.

U Syiem Assam ruh u la pynshitom jur ïa  
 ki rangbah shipai jong u hadien ka thma.  
 Hynrei u ruh u la ïap noh shen ha kajuh hi ka  
 snem.

## 12. KA JINGIALEH U LASHIT BARPHUKAN

(1667-1671)

U Lashit Barphukan u la long u khún khat-  
 duh jong u Memai Tamuli Besburua. Une  
 u Memai u la long u rangbah nongïalam shipai  
 badonnám pyrshah ïa ki Mughal ha ka por ki  
 Patsha Jehangir bad Shah Jahan. Une u Memai  
 (kaba mut u Mama) u la long u kthaw-kurim  
 jong u Syiem Jayadhwaj Singha. Kumta u  
 khún u bit bad kem ïa ka jinglong u kpa  
 jong u ha kiei kiei baroh. U ju sngap bad ïohi  
 ruh kumno u kpa jong u u pynïaid kam pyn-  
 ïaid dam bad ki rangbah jong kata ka por. U  
 don ka khmat kaba pyllun peit pyrshah kum  
 u nai-khatsawsynñia bad ym don ba nud peit  
 pyrshah ïa u

La thung rangbah nongïalam ïa u Lashit  
 Barphukan namar la shem ïa ka jingtbit,  
 jingsngewrit bad jingkitkhia jong u ïa la ka  
 kamram. Hapdeng ar bnai u la lah ban beh  
 noh ïa ki shipai Mughal shaduh ka wah

Manaha, ka pud rim jong ka Assam. Ia ka shnong Gauhati la ioh knieh bad ia u gobarnor Mughal la ioh kem.

Hynrei u Lashit Barphukan um sangeh noh tang hangta. U la tip ba kan wan ka jinghiarthma pynhiarkput bajur biang na ki Mughal. Kumta u la pynkhreh jriangia ka jingialeh bajur. La pynkhlain ia ka kut Gauhati na baroh sawdong. La thung bún bún ki rangbah shipai bad ki nongialam bashlur bad bashynrang mynsiem. La tei ki kut bakhlain ha ki lúm batawiar ia ka Gauhati. La pynkhlain ia ki lieng ban ialeh thma na um. La tih ki kharai kiba mynsaw bad la pynap klep da ki phrah sieij banep. La pynbiang ki tiar ki tar thma babieng, bad tup bad mán, bad khnam bad ryntieh, bad súm bad stieh, bad wait bad sdie, nalor ka hám ka dih kyrhai. La pynap briew man ka shiphew khatsan pruh. La phah nongsyntiat ban búd ia ka jingwan iarap na sha Bengal ne na Delhi. Ia kiei kiei baroh la pynbeit pynbiang thik-thak.


Ha u bnai khatduh ka snem 1667, u Patsha Mughal u la ioh khubor ba la knieh ia ka Gauhati. Mar mar u la phah ia u Raja Ram Singha badonnám jong ka kynhún nongialam Mughal. U long uba la iashim bynta ha ka thma pyrshah ia u Shibaji, u Syiem Mahratta, bad ia ka nám jong u la bna kylleng ka ri India.



U tang shu wan u la dawa ba dei ban pyllait ia ka Gauhati sha ka kti ki Mughal. Hynrei u Lashit Barphukan um patiauw. Haba u iohi ia ka bor u nongwanhiarthma, um treh iamih madan. U shu pynlong bún ki jingialeh-thma rieh mynmiet mynmiet. Kane ka la pynjulor ia ka tiar ka tar ki Mughal bad pyniap bún ki briew.

Shisien namar ba la pynbor eh da u Syiem Ahom, u Lashit um banse ban iapynmih madan ban ialeh bad u Raja Ram Singha. U iathuh ba un sei ar hajar ngut ki shipai, haba ha ka jingshisha u pynap saw hajar. U Ram Singha ba u sngewpoh ban ialeh bad u, u la phah nongialam da ka nongialam shipai kynthei ha khmat ki shihajar ki shipai. Hynrei ynda u iohi ba u Lashit u leh thok, u pynmareh da ki shipai shongkulai hamar ban kut ka jingiakob bad la pyniap shiphew hajar na ki shynrang ka wait jong u Lashit, shuwa ba kin lap ba poi hapoh kut. Kane ka la pynrit mynsiem ria ia u Lashit. La katta ruh um man dem hi.

U Raja Ram Singha tang shu tip ba u Lashit u pang, u sdang ban ialeh ban knieh ia ka kut Gauhati da ka jingialeh ki lieng na wah. U la iohi ba ka liang na u Lúm Khamakhya ka la long kaba i-tlot. U Lashit, uba nang peit na jynghiah pang nador lúm, u la iohi ba baroh ki lieng kin sa leit nguh leit.



Ka templ ha u lúm Khamakhya.

dem ia u Raja Ram Singha. Kumta na jyingthiah u la khie joit ban hiar ha lieng ban leit ialeh. Kane ka la ai mynsiem ia ka kynthún shipai Assam. Ki la ia am dukhi khait bad da ka jingia ther dohiap bad ialeh iap ban ri la ka jinglong laitluid ba naduh barim bajah, ki la jop thiaw, bad ki la beh krad bad pynher khynrad ia ki lieng bad shipai Mughal. Riap riap ki beh bad u Lashit u dkut mynsiem thoin, hapdeng ka jingiohi ba u la lah ban loit ban law ia ka jinglongmraw ka ri la ka jongbad ka jaitbynriew na ka kti ki nongshún. Kane ka la jia ha ka

snem 1671 saw snem hadien ba la thung  
rangbah nongialam ia u.

Ka hima Assam ka la lait na ka kti ki  
Patsha Mughal bad ka sah khlem háp hapoh  
ka jingsynshar India tat haduh ka snem 1826,  
ha kaba wan ka jingsynshar Phareng.

### 13. KA JAYMATI BAD KI KHUN KI KSIEW JONG KA

(1681-1780)

Kat kum ka rukom ki Syiem Ahom,  
u myntri rangbah lymne u rangbah duh jong  
ki shipai um lah ban kiew ia ka khet jong ka  
hima. Hynrei la don u myntri rangbah uba  
kwah ban ioh ia ka khet ki Syiem Ahom bad  
uweí u rangbah shipai u la pyniáp noh ia  
u myntri rangbah na kata ka daw. Ynda uta  
u rangbah shipai u shem ba ym don mano  
mano shuh badonbor ban shimti ia ka hima  
lait na u, u la thmu ban pyniáp ia u khynnah  
syiem ba dei hok jong ki Ahom. U Syiem  
Gadadhar Singha tang shu iohsngew ia kata  
u la her krad ryngkat bad la ka tnga jong u,  
ka Jaymati. Tang shu iohsngew ia kata,  
une u rangbah duh ki shipai u la wad ia u, u la  
thiew kumba thiew ñiut ia ka hima baroh  
kawei.

U Gadadhar u la long u riewradbah ha ka  
rynñeng rynñiot, bad uba khlain shibún. U lah

ban bá m da u khaw kat uba ioh bad da ka doh ba shu syang ha dpei ding. U lah marwei ban pynliem haduh khatsan arphew ki shipai. U la iaid na khlaw na khlaw bad poi haduh kumba arphew mail na pud ka hima Ahom ha kjat ki lúm Naga. Hangta u rangbah duh ki shipai u la ioh jingtip ba u iadon hangta bad la ka mahadei jong u, ka Jaymati. U la ai hukum ia la ka kynhún shipai ban ker kut ia kata ka jaka. Ka tnga jong u, ka Jaymati, ka la pynbor ia la u tnga ban phet iap, hynrei u la iakhing shipor, tat haduh ba ka ong balada um leh kumta, kan shu pyniäp noh ia lade khnang ban pyllait im ia u. Kumta u la phet bad iehnoh ia ka marwei kumba ka kwah.

Ki shipai ki la wad ia ka iing ka sem jong ka ha kaba ka rieh bad ki la lap ia ka. Ki la wanrah ia ka da kaba shu pynbor ia ka ban iaid kjat sha u rangbah shipai bad ka la shim por kumba ar taiew ei ei. Ka la thait ym don pyrthei shuh. Nangta u rangbah duh ki shipai u la ong ia ka ba kan iathuh hangno u tnga jong ka u don ; bad namar ba kam iathuh la teh ia ka ha u dieng : la sympat, la pynsaja jur ia ka bad la pyniäp ia ka hangta.

Hadien kata u Gadadhar u la iohsngew ia kata, u la lum la u shipai u swar jong u, u la wan ban pyllait ia ka, u la jop ia uta u rangbah shipai bad knieh ia ka khet na u ; hynrei u la

poi dier por eh namar ka tnga jong u ka la lah  
iap.

Ka Jaymati ka don arngut ki khún shynrang, kiba kyrting u Lai bad u Lashai. U Lai u la kylla long Syiem Rudra Singha hadien jong ka jingiap u kpa jong u. Une u Rudra Singha u khún nyngkong ka Jaymati, u la tih kawei ka nan bah nan san ha Sibsagarh ba la ai kyrting ka duriaw ka Jaymati lane Jaysagar haduh mynta. Ka long ka nan baheh tam hapoh Assam. U la tei ruh ka templ harud kata ka pung bad la khot kyrting ia ka ka iing-mane ka Jaymatilane ka Jaydol. Hapoh kane ka templ don u mawlyngknep uba sngem bad jrein um barobor haduh kine ki sngi. La ong ba u long ka dak jong ka jingjrein snán bad jingjaw ummat pait dohnud ka Jaymati haduh mynta mynne na kane ka jingshah pyniap.

U Rudra Singha u don bún ki khún shynrang bad u pynkular la ki khún ba yn nym kiew khet ia ka khet jong u da ki ksiew jong u, katba ki baroh shipara ki dang ia im. Kumta ynda u iap u Rudra Singha, ia ka khet la kiew nyngkong eh da u Siba Sinha, sa u Pramatta Sinha, sa u Rajeswar Sinha, khatduh eh u Laskshmi Sinha, lait noh uwei pat ba uba anna ka met ka phad. Nadien jong kine ki syiem ka hima Ahom ka la nang troin nang troin tat haduh ba la shimti ia ka da ka Sorkar Phareng na Bilat.

14. KA ASSAM NADIEN<sup>U</sup> LAKSHMI  
SINHA HADUH KA JINGWAN  
SYNSHAR KI PHARENG

(1780-1825)

**U Gaurinath Singha** (1780-1795) — Hadien ka jingiap u Lakshmi Sinha ia ka khet ha Assam la kiew khet da u khún jong u, u Gaurinath Singha. Une u la long u khún ioh-mon bad leh-mon bad kumta u shem jingjynjar shibún ban pyndem ia ki briew baieng ialeh pyrshah ia u, ki Moamaria. La u jop ia ki hawei, ki pynshitom ia u hawei pat, khek shi khek ter shi ter. U la háp phet na ka nongbah Rangpur sha Gauhati bad ieh ia ki myntri korbari ba kin ialehthma na Jorhat. Katba dang jia kumta la wan mih pat sa ki nonglute nongpynjutor na Bengal ban lute kai bad pynjutor ia ki nongshongshnong ka Assam. Um banse shuh ban pan jingiarap na u Lord Cornwallis, u gobarnor rangbah duh jong ka ri India ban beh ia ki bad ban pynioh pat ha u ia ka nongbah. U Kapten Welsh bad la ka kynhún shipai bakhlain jong u u la wan iarap ia u ban pyndem ia ki nongiakhieh ialeh pyrshah bad ban pynioh pat ia ka Rangpur, ka nongbah jong u. Ia u Gaurinath la pynkiew khet bad u Kapten Welsh u la leit phai biang sha Calcutta, ynda ki la iathoh iatar ba yn iapynroi ia ka khaii ka pateng hapdeng ki ar hima. Une u syiem u la iap noh ha ka

lingjaiñ jong u kaba ha Jorhat ha ka snem 1795, ynda u la synshar 15 snem.

**U Kamaleswar Singha** (1795-1811).—Hadien ka jingiäp u Gaurinath Singha, ym lap khúnsyiem satia babit ban kiew ia, ka' khet Assam. Kumta la donkam ban wad syiem uba bit ban shimti ia ka khet syiem. Khatduh khatwai ynda la wad la wad la lap da uwei u khynnah syiem uba long u ksiew-tun ne ksiew-miaw jong u Raja Lashai, u para u Lai ne u Rudra Singha. Ia une u khynnah syiem uba kyrteng hok u Kinaram Gohain la jied syiem bad u la shim ia ka kyrteng Kamaleswar Singha. Ha ka por jong une u syiem la don ka jingiathoh iatar bad ka jingiaphah nongkit-tiensyiem hapdeng jong u bad u Ram Singha, u syiem Jaintia. Une u la synshar khathyn-riew snem haduh ka snem 1811.

**U Chandrakanta Singha** (1811-18; 1819-1821).—Ynda u iap u Kamaleswar Singha la kiew khet pat da u para jong u, u Chandrakanta Singha. Hamar ka jingsynshar jong u la wan hiarthma ki Burma ba kumta ki rangbah myntri jong u ki pynhiar khet noh ia u ha ka snem 1818, bad la pynkiew khet pli da u Purandar Singha, u ksiew jong u Rageswar Singha. U Purandar Singha um lah beh ia ki Burma, bad u la phet krad ia lade bad iehnoh ia la ka ri ha ka snem 1819, tang shisnem hadien. La pynkiew khet biang sa shisien ia

u Chandrakanta da u rangbah Burma ha ka snem 1819. U Chandrakanta u la ĩaleh biang pyrshah ĩa ki Burma, hynrei ba u shah jop u la phet ĩap sha Bengal.

**U Jogeswar Singha** (1821-1825).—Ki Burma ki la pynkiew khet noh da u Jogeswar Singha tang ban syrpaı-syrpud pynjem pyntuid ĩa ki paidbah, hynrei ki la shimti ĩa ka jingsynshar ha la ka kti naduh ka snem 1821 haduh 1825, saw snem. U Chandrakanta Singha u la lum ĩa u phud u pyrton shipai bakhraw ban ĩaleh biang ĩa ki Burma ha ka snem 1823, hynrei um lah, kumta u la her krad biang sha Bengal. Hynrei u Iskat Sahep u wan shimti ĩa ka Assam na ka kti ki Burma ha ka snem 1825, bad naduh kata ka por ka Assam ka la hp ha ki kti ki Phareng, shispah snem tam, tat haduh ka jinglaitluid ka ri India na ka jingsynshar Phareng ha ka snem 1947.



## KI JINGKYLLI

1. Thoh jing<sup>i</sup>athuhkhana shaphang ka ri-Khasi-Jaintia bad nangno ki Khasi ki wan.

2. Iathuhkhana shaphang uwei na ki syiem bapawnám eh jong ka Hima Madur-Maskut.

3. Iathuh katba phi tip shaphang u Niang Raja.

4. Iathuhkhana katba phi tip shaphang u Sajar Nangli.

5. Iathuh shaphang ka jingshahset  
(a) u Syiem Borkusain ha Nongkrem, lane  
(b) u Borsingh Syiem ha ka kut u Sujlar.

6. Iathuh katba phi tip ña ka thma u Tirot Singh pyrshah ña ki Phareng.

7. Phi tip aïu shaphang u Raja Dakhor Singh bad ka jingsynshar jong u ?

8. Thoh lyngkot shaphang ka Hima Assam bad ña ka jingsynshar jong ka naduh barim bajah haduh ka jingwan synshar ki Phareng, da ai bad ki snem kiba donkam.

9. Iathuhkhana shaphang u Syiem Assam banyngkong eh uba ñateh-lok bad u Patsha India badonnám, u Harshabardhan.

## Lane

Iathuh ïa ka jingai jingthoh jong u Pukir Shaina badonnám shaphang ka Assam bad ki briew jong ka.

10. Iathuhkhana shaphang ki Syiem Ahom, u Suhungmung bad u Susengpha.

11. Ai jingïathuh shaphang u Sutyingpha ha ka jingïaleh jong u pyrshah ïa ki Patsha Mughal ba na Delhi.

## Lane

Iathuh katba phi tip shaphang ka jingwan hiarthma badonnám u Mir Jumla ïa ka ri Assam.

12. Thoh jingïathuhkhana shaphang ka jingpyllait-luid u Lashit Barphukan ïa ka Assam na ka kti u Patsha Aurangseb.

13. Iathuhkhana katba phi tip shaphang ka Jaymati.

14. Iathuh lyngkot ïa ka jingsynshar ïa ka ri Assam naduh ka por u Gaurinath Singha haduh ka jingwan synshar ki Phareng.





**Ki Kot Khasi ba lah ban ioh na ki nongdie  
kot Khasi ha Shillong lane na ki  
nongthoh hi harum :—**

***Da i kong Beatrice Mittra,  
Jaïaw, Shillong.***

1. Ka Histori jong ka ri India (IV-VI) ... 1 T. 50 P.

***Da u Bah Frank M. Pugh,  
Jaïaw, Shillong.***

2. Ka Kot Hygiene (IV-VI) .. .. 1 T. 50 P.  
3. Ka Kot Geography (IV-VI) ... .. 2 T.  
4. Ka Drama u Shakespeare, Katha phi mon 2 T. 50 P.  
5. Ka Daïalok Nangno u Khasi u liarpateng 1 T.  
6. U Khún Syiem na ka ling u Dabid Kitab I 1 T.  
7. U Khún Syiem na ka ling u Dabid. II & III 2 T.  
8. Ka Phawár-Rwái Khasi ... .. 1 T. 50 P.  
9. Ka Shang Syntiew ... .. 1 T. 50 P.  
10. Ka Kot Geometry Thymmai (IV-VI) ... 1 T. 50 P.  
11. U Khún Syiem na ka ling u Dabid IV & V 2 T.  
12. U Romeo bad ka Juliet ... .. 2 T.  
13. Ka Histori jong ka Assám (IV-VI) ... 56 P.  
14. Ka Gulabpi (Ka Khana India) ... 3 T.  
15. U Elija, Ka Prosodi bad Retorik .. 3 T.  
16. Ka Jingiarap ia ki Kot B. A. Khasi I 2 T.  
17. Ka Jingiarap ia ki Kot B. A. Khasi II .. 2 T. 50 P.  
18. Ka Shang Khmih-Pyrthei u Lord Clwyd 2 T.  
19. Ka Tem-Ding ia ka Shla-Briew ... 2 T.  
20. Ka East Lynne Kitab I (a) ... 1 T. 50 P.  
21. Hynrei Mynta Ngi lalong Khristan ... 1 T. 50 P.  
22. Ka East Lynne Kitab I (b) .. 1 T. 50 P.  
23. Ba la pynim ban shakri .. 1 T.  
24. Ka shem-lanot u Macbeth .. 2 T. 50 P.  
25. Ka Jingim lajong u John B. Gough I .. 1 T. 50 P.  
26. Ka jingiarap ia ki kot B. A. Khasi III .. 2 T.  
27. Ka Jingiar ka Ktien Khasi I & II .. 5 T.